

ODRŽANA INSPIRE – GEOSPATIAL WORLD FORUM KONFERENCIJA

30.05.2015 17:59



Ovogodišnja INSPIRE (Infrastruktura za prostorne podatke u Evropskoj uniji) konferencija organizirana je u saradnji s Geospatial World Forumom i održana je pod nazivom „INSPIRE – GWF 2015„ od 25. od 29. 5. 2015. godine u Lisabonu, Portugal.

INSPIRE konferencija je jedinstven događaj koji okuplja korisnike i proizvođače podataka te ujedno i kreatore politika iz cijelog svijeta kako bi razgovarali o svim temama koje se tiču INSPIRE direktive, ali i više od toga. Svake godine učešćem na konferenciji organizira se forum akterima iz vlada, akademske zajednice i industrije gdje je moguće čuti i razgovarati o najnovijim događanjima u sferi INSPIRE

direktive, ali i sferi prostornih podataka općenito. Konferencija pruža odličnu priliku da se evropskoj zajednici predstave dešavanja u nacionalnoj infrastrukturi prostornih podataka.

Ovogodišnja INSPIRE konferencija je bila orijentirana na predstavljanje geoprostornih tehnologija i najboljih primjena u praksi, te je na jednom mjestu spojila vođe politika i industrije geoprostornih tehnologija s praktičarima i klijentima u ovom polju. Konferencija je ujedno prilika za izgradnju javno-privatnog partnerstva između onih koji imaju potrebu za prostornim informacijama (okoliš, promet, energija, komunalni uređaji, upravljanje vodama, poljoprivreda itd.) i onih sposobnih za isporuku i upravljanje tim podacima kroz geoprostorne tehnologije i infrastrukturu prostornih podataka, kao što je to INSPIRE.

Federalna uprava za geodetske i imovinsko-pravne poslove je i na ovogodišnjoj konferenciji osigurala učešće putem CILAP i IMPULS projekata izgradnje kapaciteta koji se trenutno veoma uspješno provode u saradnji s geodetskom upravom Kraljevine Švedske – Lantmäterietom. Tako su na konferenciji u ime Federalne uprave za geodetske i imovinsko-pravne poslove prisustvovali direktor Uprave g. Željko Obradović, direktorica CILAP projekta gđa Anđa Zimić, pomoćnik direktora u Sektoru za geoinformatiku g. Nedžad Pašalić, te zaposlenik Sektora za geoinformatiku g. Denis Tabučić.